

STANDARD 3 EXPRESSIVE ARTS SUMMARY NOTES

**COMPILED BY BLESSINGS
NKHOMA**

**A TEACHER AT KASACHE
PRIMARY SCHOOL**

THAVITE ZONE

SALIMA DISTRICT

0998603292/0881845347

CHICHEWA VERSION

MUTU 1: KUYENDA MOTSATATA MAVUME

Mawu owonetsa kachitidwe poyenda

-Kuyenda ndi chinthu chimodzi chomwe timachita tsiku ndi tsiku. Nthawi zina timangodziyendera tokha osalamulidwa koma nthawi zina timayenda motsatana ndi mmene akutilamulira. Wolamulira akhoza kunena mawu, kuyimba ng'oma, kuliza wezulo kapena kuyimba m'manja.

-Wolamulira akamatsata ndondomeko yabwino poyimba ng'oma, wezulo kapena m'manja, mayendedwe amakhala a dongosolo. Zimenezi zikhoza kuchitika poyenda, kuthamanga, kudumpha kapena povina. Izi zimatheka ngati malangizo akumveka bwino. Magule ambiri amatsatira ng'oma kapena wezulo.

Kuyenda motsatira ndakatulo

-Nthawi zambiri timayenda mogwirizana ndi zinthu zosiyanasiyana. Timakhoza kuyenda mogwirizana ndi mawu anyimbo kapena mawu a ndakatulo. Kuomba m'manja, kuyenda komanso kuyimba ndi kuvina kumathandizira kuti ndakatulo imveke bwino.

MUTU 2: MALAMULO NDI ZIZINDIKIRO

Zizindikiro za mawu ndi zopanda mawu

-Pali zizindikiro zosiyanasiyana zomwe anthu amagwiritsa ntchito. Zizindikiro zimathandiza kulandira kapena kutumiza mauthenga. Zizindikiro zimathandizanso kupewa ngozi.

-Zizindikirozi zimagawidwa m'magulu awiri: za mawu komanso zopanda mawu. Mwachitsanzo, tikhoza kuyitana mzathu patali powomba m'manja kapena kukodola.

-Belu ndi chizindikiro chimodzi chopanda mawu chomwe chimathandiza ana asukulu kuti adziwe nthawi yoyamba kapena kumaliza maphunziro.

-Akhirisitu m'matchalitchi amayimba belu panthawi yolowa m'tchalitchi. Ichi ndi chizindikiro chopanda mawu. Asilamu amayamba muazini ndipo ichi ndi chizindikiro cha mawu.

-Zizindikiro zimagwiritsidwanso ntchito povina, posewera mpira, ngakhale pa masewero olumpha chingwe.

Zikwangwani za pamsewu

-Zikwangwani zapamsewu ndi zofunika kwambiri chifukwa zimathandiza kupewa ngozi.

-Pali zikwangwani zina zomwe zimalozera njira kapena msewu umene munthu ayenera kudzera, zina zimasonyeza malo ndipo palinso zina zomwe zimachenjeza munthu pa zomwe akumane nazo kutsogolo.

-Zikwangwani zina zimalembedwa mawu pamene zina amajambulapo zithunzi kapena zitchetche zokhala ndi matanthauzo osiyanasiyana.

-Ndikofunika kudziwa matanthauzo opezeka pa zikwangwani chifukwa zimathandiza kupewa ngozi kotero sitienera kuziononga.

MUTU 3: KUPEREKA MAGANIZO MOMASUKA

Njira zoperekera maganizo

-Munthu akhonza kudziwa maganizo amzake kudzera m'mawu kapena zinthu zosemasema, zoluka ndi zojambula zimene zilibe mawu.

-Muzisudzo kapena mundakatulo, anthu amalakatula momveka bwino, mosangalala kapena mwachisoni ndi mawu apakamwa pawo. Sewero likhoza kukhala lachisoni kapena lachimwemwe malingana ndi m'mene munthu wagwiritsira ntchito mawu.

-Zojambula, zosema ndi zoluka siziyankhula koma zikhoza kupangidwa kuti zisonyeze maganizo a munthu. Zikhoza kusonyeza chisoni kapena chimwemwe malingana ndi momwe munthu wapangira.

Kupereka maganizo poyankhula kapena posayankhula

-Munthu atha kufotokoza maganizo ake pogwiritsa ntchito mawu kapena ayi. Munthu atha kusonyeza kukwiya pa nkhope yake kapena kusangalala. Akhozanso kusonyeza kukondwa m'mayendedwe ake.

MUTU 4: KUTHANA NDI ZOLEPHERETSA POPANGA NDI POCHITA ZALUSO

Zolepheretsa popanga zaluso

-Pamene tikupanga zaluso, tikhoza kukumana ndizolepheretsa zosiyanasiyana. Mwachitsanzo, pamene tikusoka malaya, zingano akhoza kutibaya kapena pamene tikuvina, anzathu akhoza kutiponda. Nthawi zonse pamene takumana ndi ndizolepheretsa tizindikire kuti pafunika kuganiza mozama ndi mofulumira kuti vuto labwera bwanji ndipo tichite chiyani kuti vutoli lithe.

Njira zabwino zoyenera kutsata popanga ndi pochita zaluso

-Kudziwa zolepheretsa zomwe tingakumane nazo popanga ndi pochita zaluso ndikofunikira. Tiyenera kupeza njira zabwino zothetsera zolepheretsanzi.

-Popanga ndi pochita zaluso tiyenera kuganizira bwino ndi modekha kuti tipewe zolepheretsa.

MUTU 5: KUVINA KOTSATA MVEKERO M'MAGULE AM'MADERA

Zochitika m'dera lathu

-M'madera mumachitika zinthu zosiyanasiyana monga ukwati, chinamwali, khirisimasi, pasaka ndi idi.

Nyimbo zoyimbidwa pa zochitika zosiyanasiyana

-Kuyimba nyimbo ndi njira ina imene anthu amagwiritsa ntchito pofuna kunena maganizo awo. Nyimbo zosiyanasiyana zimakhala ndi uthenga wosiyanasiyana. Mwachitsanzo, nyimbo zachinamwali zimasiyana ndi nyimbo zaukwati.

-Nyimbo zimayimbidwanso popereka uthenga wokhudzana ndi ziphuphu, matenda a edzi ndi kusasiyanitsa pakati pa amuna ndi akazi. Uthengawu utha kuperekedwanso bwino pophatikiza nyimbo ndi zisudzo.

MUTU 6: KUCHITA MALUSO

Udindo wa anthu osiyanasiyana m'madera

-M'madera muli maudindo osiyanasiyana. Mwachitsanzo, mumapezeka mafumu, atsogoleri azipembedzo, aphunzitsi komanso alangizi. M'banja mumakhala abambo, amayi ndiponso ana. Onsewa amakhala ndi maudindo osiyanasiyana.

Zidole

-Zidole zimapangidwa kuchokera kuzinthu zosiyanasiyana. Titha kupanga zidole kuchokera ku udzu, mapesi, thonje, mapepala ndi dongo. Zidole kuti zioneke bwino pamafunika kuzikongoletsa polochalocha kapena kupaka utoto.

Kuyitana ndi kuvomera

-Munthu aliyense akamaitana amayembekezera kuyankhidwa. Anthufe amatiyitana mu njira zosiyanasiyana ndipo oyitanayo amayembekezera kuyankhidwa moyenera.

-Kuyitana ndi kuvomera kumapezekanso mu nthano, nyimbo ndi masewero.

MUTU 7: KUWONETSA MAGANIZO KUDZERA M'ZALUSO

Mayendedwe a nyama kapena anthu osonyeza momwe akumvera

-Nthawi zambiri maganizo osiyanasiyana amawonetsedwa kudzera m'zaluso zosiyanasiyana monga zisudzo, magule komanso zithunzi ndi zizindikiro zina monga za pamsewu.

-Mayendedwe osiyanasiyana amasonyeza momwe munthu kapena nyama zikumvera.

Luso la zisudzo

-Zisudzo ndi njira imodzi yosonyezera m'mene munthu akumvera. Zisudzo ndi njira yabwino yowonetsera m'mene mukumvera chifukwa anthu amasangalala komanso kuphunzitsidwa.

-Njira ina yowonetsera m'mene munthu akumvera ndi kupanga zaluso monga zosema, zoluka ndi zowumba.

Zizindikiro ndi zithunzi zowonetsa momwe munthu akumvera

-Pali zinthu zosiyanasiyana zimene zimatithandiza kuwonetsa m'mene tikumvera m'maganizo ndi mumtima mwathu. Zinthuzi zikhonza kukhala zojambula, zolocha kapena zizindikiro zosiyanasiyana.

-Zojambula ndi zizindikiro zikhoza kulochedwa ndi zinthu monga makala, mwaye, dothi, choko chamitundu yosiyanasiyana ndiponso mtedza wopserera.

MUTU 8: KUPANGA ZINTHU ZOGWIRITSA NTCHITO PAKHOMO

Zinthu zofunika pakhomo

-M'makomo timagwiritsa ntchito ziwiya monga masache, mitondo, misi, miphika, madengu, mphasa ndi malichero.

-Zina mwa ziwiwazi tikhoza kugula pamene zina tikhoza kupanga tokha.

Ziwiya zapakhomo

-Pali ziwiya zosiyanasiyana zimene timagwiritsa ntchito pakhomo. Zina mwaziwiyazi timaphikira, zina mwa izo timakongoletsera pakhomo kuti pazioneka bwino. Ziwiya zina titha kugula komanso zina tikhoza kupanga tokha.

Chiwonetsero cha zinthu zomwe zapangidwa

-Zinthu zikapangidwa pamafunika kuziyika pa chiwonetsero kuti ena zikawasangalatsa agule.

-Anthu adzatengeka kugula malingana ndi momwe zinthuzo zapangidwira ndi momwe chiwonetsero chakonzedwera, ziwonetsero zikhoza kupangidwa m'kati kapena kunja kwa kalasi.

MUTU 9: KUPANGA NDI KUKONGOLETSA ZIDOLE

Kupanga zidole

-Zidole zimakhala zosiyanasiyana. Zina titha kugula pamene zina titha kupanga tokha. Tingapange zidole pogwiritsa zipangizo monga mapesi, waya, dongo komanso zigamba.

-Zidole zimathandiza kuti manja azolowere kugwira zinthu pokonzekera kulemba ndiponso kujambula.

Kukongoletsa ndi kugulitsa zidole

-Zinthu zikakongoletsedwa zimawoneka bwino. Chinthu chooneka bwino chimagulidwa mwamsanga. Zidole zikhonza kukongoletsedwa pozipaka utoto kapena kulocha.

MUTU 10: ZALUSO KUDZERA MUNYIMBO, MASEWERO AZISUDZO NDI OLIMBITSA THUPI

Nyimbo, masewero azisudzo ndi olimbitsa thupi

-Pali njira zambiri zomwe tingawonetsere maluso athu monga kuyimba nyimbo, kuvina, kuchita masewero azisudzo ndi olimbitsa thupi.

-Tikhoza kugwiritsa ntchito zaluso popereka mauthenga osiyanasiyana ndi kuphunzitsana chikhalidwe chabwino.

Khalidwe loyamikira powonerera zaluso

-Powonerera zaluso monga kuvina ndi kuyimba nyimbo, masewero azisudzo ndi olimbitsa thupi timayembekezera kusangalala koma timakwiya ngati chiyembekezo chathu sichinachitike.

-Momwe takondwera kapena kukwiwira zitha kuyambitsa ziwawa panthawi yomwe tikuwonerera zalusozo. Ili ndi khalidwe loyipa choncho tiyenera kuphunzira kukhala ndi khalidwe lovomereza momwe zinthu zachitikira.

MUTU 11: ZALUSO

Atengambali munthano

-Nthano ndi mbali imodzi ya chikhalidwe cha anthu. Kale nthano zinkakambidwa anthu akuwotha moto ndi cholinga chofuna kusangulutsana kapena kupereka phunziro lokhudza makhalidwe abwino. Masiku ano zina mwa nthano zimenezi zimalembedwa ndipo zikhoza kuwerengedwa m'mabuku osiyanasiyana.

-Nkhani kapena nthano iliyonse imakhala ndi Atengambali. Atengambali munkhani akhoza kukhala anthu kapena nyama.

Zithunzi zopereka uthenga

-Mauthenga amaperekedwa munjira zosiyanasiyana monga kulemba, lanya, nyimbo, magule komanso zithunzi. Zithunzi zikhonza kujambulidwa mu njira zosiyanasiyana monga pamanja kapena kugwiritsa ntchito makina.

Kupeka nyimbo zowonetsa mmene munthu akumvera

-Anthu amasonyeza kapena kuwonetsa mmene akumvera m'njira zosiyanasiyana monga poyimba kapena povina. Izi zitha kusonyeza kukondwa kapena kukhumudwa.

-Popeka nyimbo tikhoza kugwiritsa ntchito mawu munyimbo yodziwika kale kapena kupeka nyimbo yathuyathu.

-Nthawi yomwe tikuyimba, titha kuvina pofuna kutsindika momwe tikumvera.

Malingaliro

-Kawirikawiri munthu amaganiza zinthu zimene amazifuna. Nthawi zina amalakalaka zinthu zovuta kuzipeza. Maganizo otere ndi amene amatchedwa malingaliro ndi zikhumbokhumbo.

-Malingaliro ndi zikhumbokhumbo zimathandiza munthu kuganizira njira zoti achite kuti apeze zimene akufuna.

MUTU 12: KUTAKASUKA KWA THUPI

Kupanga manambala ndi zilembo ndi ziwalo zathu

-Kutakasuka kwa thupi lathu ndikofunika m'zochitika zaluso zosiyanasiyana. Titha kuvina, kuyimba kapena kupanga masewero ngati thupi lili lotakasuka. Tikhonzaso kupanga zinthu zangodya ndi zopanda ngodya komanso manambala pogwiritsa ntchito matupi athu.

Magule ndi nyimbo zofotokoza maganizo

-Anthufe timakhala ndi maganizo osiyanasiyana. Tikhoza kufotokoza maganizo athu kudzera munyimbo kapena m'magule.

BUKU LOMWE LAGWIRITSIDWA NTCHITO

●Buku la Ophunzira La Expressive Arts la Sitandade 3

ULEMU NDI MATAMANDO ZIPITE KWA MULUNGU!!!!!!!!!!!!